



















N. n.

# PLAINCTE IVSTIFICATIVE

DE LOVIS DE BEAUMANOIR  
*pour les Peres Jesuites.*

CONTRE LA REMONSTRANCE  
& plaincte de M<sup>re</sup> LOVIS SERVIN,  
Aduocat du Roy.

*Adressee à la Cour de Parlement  
de Paris.*

1768 - - - 11-1-

---

M. DCXV.

THE NEWBERRY  
LIBRARY

Case

F

39

326

1615-21





PLAINTE  
JUSTIFICATIVE

DE LOUIS DE BEAUMANOIR  
*pour les Peres Iesuites.*

CONTRE LA REMONSTRANCE  
& plainte de M<sup>re</sup> LOUIS SERVIN,  
Aduocat du Roy.

*Adressee à la Cour de Parlement  
de Paris.*



ESSIEURS,

Iusques à quand seront les  
Iesuites en defence? leurs  
ennemys en embusche?  
leurs calomniateurs en credit? leur re-  
putation en proye, & leurs souspirs  
en attente? Ayant entrepris de vous  
donner cette defense en la cause des Ie-  
suites ou plütoft du public qui est interes-  
sé en leur perte, qu'il me soit loisible de  
commencer par les paroles de ce vieil-

A ij



lard Iesuite que la France cognoist, avec lesquelles il implora pour ses freres en leur grande affliction, la iustice & clemence de HENRY LE GRAND, leur estant encor ennemy; Et qu'ensemblement ie vous puisse ramenteuoir ce qui vous esclaircira vn point important & donnera occasion de rendre à chacun ce qui luy est deu selon la balance de bonne iustice. Je suis François de nation, Catholique de Religion, tres-fidele & tres-humble seruiteur & sujet de mon Roy, & vous honore comme souuerains Officiers de sa Majesté: & la bonne conscience me dit que ie suis obligé à ce deuoir, & defendre en la cause des Iesuites l'honneur de Dieu, du Roy & de ma patrie; & puisque les Errans publient sans craindre leurs heresies en vn Royaume tres-Chrestien, ie crois qu'aucun homme de bonne foy & prudence ne me condamnera, escriuant la verité pour la verité. Je dis donc que ce grand Henry auoit tousiours hay les Iesuites, exasperé des rapports des Ministres & autres supposts de mesme intention & secte, & ayant à la fin cogneu leur innocence & iugé leur Ordre vtile à son Royaume, & digne de son amitié, les



*Iustificative.*

restablit en leur patrie , redoublant le nombre de leurs Colleges, comme chacun a sceu & admiré , & leur donnant le repos tant désiré par les gens de bien ; & par eux les faisoit heureusement travailler en la culture des ames , nommement en la reduction de celles qui estoient hors de la bergerie du Sauueur. Ils iouyrent de ce repos travaillans sous l'ombre de ce grand Roy , tant qu'il iouyt du depuis de ce mortel séjour ; Mais aussi-tost qu'il eut rendu l'esprit , & quasi luy palpitant encores le cœur Royal , voila sur pieds leurs ennemis , qui comme regaillardis , & fortifiez d'une nouvelle occasion du mal & dueil public , renouellerent la guerre avec leurs troupes & armes accoustumées de calomniateurs , & de calomnies sous l'estendard d'un qui tenoit la place de Capitaine , qui leur fit jetter le grand deffy, les accusant comme coupables de la mort de ce Roy. Les predicateurs apostez sonnoient le mensonge en la chaire de verité ; les Imprimeurs faisoient parler leurs presses , les Anticotons, les Anti-Iesuites, Antigornais & autres oiseaux de mesme bec & ramage, voltigeoient par la France, & les places,



boutiques & banquets retentissoient des mesdisances iettees contre les Iesuites: Et combien que ce fut vne calomnie lourde, sans figure, & sans entregent de probabilité, si entra-elle au cerueau de plusieurs personnes trop simples, & donna hardiesse aux malins d'vser de l'occasion & heurter ceste compagnie à grâdes secousses. Estant à peine passé cet orage, suiuit en queuë l'autre quand les Iesuites demanderent d'enseigner en l'Vniuersité, selon la volonté, & lettres Patentes de leurs Majestez, & vaquer à instruire la ieunesse pour leur part à Paris, comme ailleurs. Alors, non seulement ils n'obtindrent point ce qu'ils demandoient, encor que tres-raisonnable, mais avec le refus, receurent l'affront que chacun scait par le plaidoyé d'un Aduocat, qui portoit en sa memoire l'Anticoton, & le declama contre eux au parquet de Iustice. Depuis cela ils traualloient en patience, & selon leurs forces, & seruoient le public par predications, confessions, & autres exercices de pieté, avec paix & edification, & voicy encor vn renouveau de persecution au cœur de l'Esté, sur la fin de Iuin dernier, quand l'Arrest fut

*Iustificatiue.*

7

donné contre le liure de François Suarez Theologien de leur Compagnie, & la remonstrance de M. Seruin Aduocat du Roy publiee; duquel arrest ie n'ay rien à dire, & veux reuerer la sainte Iustice, & les ordonnances d'icelle; Ma plainte & defense est fondee sur le grief des Iesuites, & diffamation de leur ordre procuree par ceste remonstrance espenduë aux frais des innocens par toute la France, & pays voisins, à plusieurs milliers en mesme temps, l's publiant par autant de libelles fameux, comme auteurs d'une peruerse doctrine, & preiudiciable aux puissances souueraines des Roys & Princes Chrestiens, pour les rendre odieux aux grands & aux petits, & susciter contre eux la fureur de quelque sedition & carnage funeste. Messieurs iusques à quand? I'implore vostre iustice & secours en faueur de la iustice, & des innocens; iusques à quand les persecuteront ces bons Chrestiens qui ne leur pouuans obiecter aucunes fautes propres, en font venir du Septentrion & Midy, & du bout du monde pour les leur faire payer? Et quelle condition sera celle des François de ceste compagnie es-



parse par tout le monde, s'ils doivent respondre de tous les defaux qui se feront par les escriuains d'icelle? Si les Allemans ou les Espagnols escriuent, eux qui sont François, & n'en peuuent mais, doivent ils soustenir la peine de leurs escrits, & porter le marc du verjus que les autres auront pressé? La Loy de Dieu punit les criminels, & non les innocens; les Loix Ciuiles chastient les auteurs du mal, & les complices, mais nulle loy condamne l'innocent pour le coupable. Vous desirez, Messieurs, qu'aucun escrit ne sorte des Iesuites qui puisse troubler la paix, ou iustement offenser le prochain, & faictes bien, ils le desirent aussi, & à ces fins, comme j'ay aprins, sont destinez par leur General à Rome, & ailleurs, quatre Docteurs Theologiens versez en toute bonne litterature pour reuoir les escrits qui doiuent venir en lumiere, & rayer tout ce qui peut estre contraire à la Foy, & aux bonnes mœurs, ou preiudicier en quelque façon au bien du commun, ou du particulier; & demandent encor l'approbation des Ordinaires. M. Seruin se plaint en ceste sienne remonstrance, que  
l'on

l'on seme des maximes execrables contre les puissances souueraines des Roys ; & c'est luy qui les seme, & ce qui est pire, les amplifie aux despens de la verité ; & du prochain ; & sans luy, ou ses semblables, personne ne scauroit la periode de Mariana, dont il a prins le feu, & le soufflé avec l'Anticoron, & les autres pour les faire brusler de haine & d'enuie, de laquelle periode au parauant on n'auoit donné mot, ny ouy nouuelles ; Il n'y auoit que les gens doctes qui sceussent ce que Suarez refutant les erreurs d'Angleterre auoit escrit de la puissance du Pape contre les Tyrans. Ceste remonstrance l'a fait scauoir à tous, non avec la verité & sens del'Autheur, mais avec des gloses mensongeres, appliquant aux Roys ce qui a esté dit contre les Tyrans; gloses pernicieuses qu'il a publiees à tout le monde, comme i'ay dit, à plusieurs milliers d'exemplaires distribuez par les villes de France, d'Angleterre, & d'autres pays, qui entendent le François, où l'on n'oyoit ces mois derniers de Iuillet & d'Aoust que Colporteurs, crians par les rues, *Remonstrance & plainte des gens du Roy*. Si c'est chose dangereuse à l'Estat & person-



ne des Roys, que les maximes qu'il appelle execrables soient cogneuës comme il confesse, pourquoy les seme-il, & les faict cognoistre? dira-il que c'est pour les faire abhorrer, & detester, comme il pretexte en la page quatorziesme? Et ne feroit-ce pas vn office de plus grande fidelité enuers le Roy, & assurance de sa personne, de supprimer ces maximes, & faire qu'on ne les sceust point du tout, estant beaucoup plus assuré d'ignorer le mal que se garder de le faire quand on le scait, ou pour le moins qu'on se fust contenté que telle escriture fust enseuelie apres sa condamnation? Solon ne voulut point faire de loy contre les parricides, à ce que personne ne pensast que tel peché se peut commettre, estimant le silence plus vtile que la loy en cela. Que signifie donc ceste extreme diligence de faire courir ces bruits dangereux, sinon l'enuie desmesuree que ces gens ont de diffamer les Iesuites, monstrans apertement qu'ils sont plus ardans à rēdre odieux leur nom que chercher l'assurance du Roy, & du bien de son Royaume, & qu'ils visent à la ruine de cet ordre, & apres de l'Eglise Catholique, & non au salut du Prince?

V o y s ne voulez , Messieurs , qu'on  
tienne aucune doctrine contraire aux  
puissances souueraines des Roys ordon-  
nez , & establis de Dieu , ny qui induise  
les subiects d'attenter à leurs personnes;  
c'est la raison , & la loy diuine ; & vostre  
volonté est tres-iuste, & si ie cognois bien  
l'esprit des Iesuites, ils ont la mesme vo-  
lonté, & si i'ay bien entendu leurs liures,  
ils n'ont iamais tenu le contraire. Et leurs  
aduersaires n'ont sceu encor monstrier a-  
uec tout l'appareil de leurs calomnies,  
que la doctrine de ceste Compagnie soit  
autre que celle des saincts Conciles , des  
saincts Canons , & Docteurs Orthodo-  
xes ; & qu'ils le monstrent s'ils peuuent,  
non par fausses accusations , & par gloses  
de fantasie , & periodes de mots espou-  
uentables, n'ayans que le son , mais par  
vrais textes de bonnes escritures & sain-  
ctes loix. Or afin d'informer encor de la  
verité ceste Cour Souueraine & les es-  
prits Catholiques , & fermer la bouche,  
si faire se peut , à la calomnie , voicy le  
sommaire de la doctrine des Iesuites , que  
i'ay aprins d'eux de voix viure, & de leurs  
escrits au poinct qui concerne les Roys:  
Car quant est des Tyrans ils ne dient au-



tre chose sinon ce qui est porté au decret de leur General Claude Aquaviva , que vous approuvez , & auez demandé estre renouuellé ; aussi est-il selon la doctrine Catholique , & nommément du Concile de Constance, tres fauorable à la cause des Roys. Ils tiennent donc que les Roys sont donnez de Dieu ; qu'ils sont souverains en leur temporel ; que leurs personnes sont inuiolables ; qu'aucun ne les peut deposer , ny les priuer de leurs Domaines ; que les subiects qui s'esleuent contre eux, soit en leur particulier par menee secrette , soit par reuolte publique , & manifeste , ou qui attētent & machinent sur leurs personnes , sont criminels de leze Majesté diuine & humaine , estant certain qu'ils contreuient aux loix de Dieu , & au droit des gens. Je crois, Messieurs , que vous n'en demandez pas dauantage d'eux , & me persuade qu'ils sont prests à exposer leurs vies pour ceste doctrine, & pour le seruice de leurs Rois. Que dict donc Suarez & les autres Auteurs que la Remonstrance de M. Seruin touche d'un style non sanguinaire, mais de cautere actuel brulant & mordant ? C'est icy le nœud de la difficulté, &

le principal poinct de ceste plainte, Messieurs, où ie requiers humblement vostre oreille benigne & attentiue, esperant que ce sera l'endroit où vostre prudence touchera la verité en son centre, & verra la façon de faire, & de gloser de ceux qui trauerfent les Iesuites. Je dis donc en premier lieu, que Suarez eust bien faict pour ses compagnons François de ne traiter en ce temps la question des Tyrans ; Car il n'eust pas donné occasion ny prise à M. Seruin, & à ses adherens de gloser comme ils font, afin de mettre en peine les innocens ; ny à moy contrainte de parler de luy, & en luy defendre le droit & reputation des Iesuites pour desabuser le public, & m'asseure que s'il eust sceu le decret du General, il eust sauté ce poinct, encor que s'estant proposé de refuter les erreurs d'Angleterre il fut aucunement contraint de l'exposer.

Je dis en second lieu, que si ce qu'a escrit Suarez s'entend des Roys, comme expose M. Seruin, il est digne de plus grande punition que du feu, pour estre iniurieux aux puissances souueraines, donnant occasion aux subiects de se rebeller contr'elles. Mais s'il n'a rien dict



contre les Roys; ains seulement contre les Tyrans, ayant puisé sa doctrine des saincts Conciles, anciens Decrets, & Docteurs Orthodoxes, comme il est euident par la seule lecture, M. Seruin n'a pas informé la Cour fidèlement, ny en Aduocat du Roy, & a fait vn affront tres indigne de tel officier au public, & vn insigne tort contre bonne conscience à la reputation de ce Docteur, & de l'Ordre, duquel il est Religieux, exposant en vn sens contraire ses paroles, & faisant entendre au Parlement (pour tirer les Iesuites en haine & peril en la personne de Suarez) que ce qu'il escriuoit contre les Tyrans il l'escriuoit contre les Roys, qui est vn malin & pernicieux change, & vn equiuoque aussi trôpeur, que si quelqu'un ayant ouy parler contre les loups fit accroire que c'est cōtre les Pasteurs, & brebis; Car Roy & Tyrā sont supposts aussi cōtraires en qualité, que le Pasteur & le loup en nature. Et ne se trouuera en Suarez vne seule periode contre la Majesté des Roys, ny contre leurs droicts & puissances; ains tout ce qui se peut Chrestienement, veritablement & doctement dire de leur excellence & autorité; Et comme l'Aduo-

cat a vsé d'un trompeur equiuoque donnant vn pernicleux faux entendre à la Cour, aussi a-il faict vne grande iniure à son Roy, & à tous les Monarques, & Princes Chrestiens, de leur appliquer ce qui a esté dit contre les Tyrans, & defendre leurs Corônes & vies, avec vn tiltre, non seulement ignominieux, mais encores tres-perilleux; Car ceux qui cognoissent par toute la Chrestienté Suarez, croiront plustost à ce qu'il enseigne qu'à ce que dit l'Aduocat; & si sa doctrine est contre les Roys, comme il glose, elle sera renduë probable & plausible par le nom de l'auteur, estimé à bon droict vn des plus grands Theologiens de son siecle; & autant preiudiciable à la cause des Roys. De maniere qu'ores que fust veritable ce que dit M. Seruin de ce Docteur, il seroit plus vtile aux Roys qu'il fut caché que publié. Quel crime donc de le publier contre la verité, & contre le sens de Suarez, & le diffamer afin de diffamer son Ordre au danger & preiudice des Roys? Or si sans entreprendre vn proluxe discours pour defendre les Iesuites en defendant la doctrine de Suarez, ie cite pour toute defense vn grand Iurif-



M. Jean de  
Mansencal  
premier  
resident au  
Parlement  
de Tholose  
l'an 1550.  
au traité  
de la puis-  
sance du  
Roy 3. Re-  
solution.  
l'autorité  
du Roy.

elle du  
Pape en cas  
de Tyrannie.

consulte & vn grand Officier du Roy,  
seant premier aux Fleurs de Lys au secōd  
Parlement de France, tres-zelé pour les  
droicts & salut des Roys, & deuant vous  
tesmoin irreparable, qui dit en substance  
conformement aux saincts Conciles, an-  
ciens Decrets, & Docteurs Catholiques  
tout ce qu'escriit Suarez, que dira M. Ser-  
uin ? Cet Autheur est feu Messire Jean  
Mansencal premier President au Parle-  
ment de Tholose, lequel l'an 1551. de-  
fendant les droicts du Roy au traité inti-  
tulé, *De la verité & authorité de la Iustice,  
& iurisdiction du Roy tres-Chrestien*, dit ce-  
cy en faueur du Roy pour le regard du  
temporel. *Quant à la puissance & iurisdic-  
tion seculiere, le Roy de France n'est subiect au  
Saint Pere, n'à autre quelconque; ains est  
quant à ce souverain en son Royaume, sans re-  
cognoistre autre superieur que nostre Redem-  
pteur Iesus-Christ, & ceste superiorité n'im-  
porte aucune derogation, usurpation, ou irreue-  
rence, contre la souveraine dignité, excellence,  
authorité du Saint Pere, & saint Siege A-  
postolique. A tant pour le Roy. Apres il  
adiouste de mesme fil pour la puissance  
du Pape sur les Tyrans: N'importe aussi  
qu'on les Roys conuertiroient leur regne en  
tyrannie*

tyrannie ou feroient quant à la temporalité, ou quant aux malefices, loix contraires à l'honneur de Dieu, & à ses Commandemens; ou maintiendroient leurs subiects en licence de crimes, & scandales, & sectes pernicieuses, ou se rendroient obstinez ou incorrigibles en manifeste, & patente transgression de la loy de Dieu (dont par sa sainte grace vucille preserver & garder tous les Princes Chrestiens) Nostre Saint Pere le Pape n'aye en ce cas iurisdiction, & authorité legitime sur les Roys Souuerains. C'est vn premier President d'un tres-graue Parlement, qui parle, defendant la iurisdiction de son Roy; Or ce qu'il escrit est le sommaire & la substance de tout ce que dict Suarez en tous les lieux que l'Aduocata colligez, & desquels il compose ses maximes execrables, horribles, espouuentables & seditieuses! Que si ce President a parlé selon Dieu, & verité, & n'a esté iamais repris de personne en sa proposition, ny estimé auoir parlé contre les Roys, mais seulement contre les Tyrans, selon sa description, que peut dire M. Seruin contre Suarez, qui dit le mesme que ce President? Et comment peut-il avec si grande exaggeration de paroles horribles donner à ses proposi-



Remedes  
contre les  
Tyrans ti-  
rez du  
droict de la  
nature &  
des gens.

tions, des epithetes si execrables, & si espouventables? Et est à noter que ce Seigneur Président a tenu & escrit ce que la lumiere de la raison & de la loy Chrestienne luy auoit aprins, & que chascun homme de iugement apprend par bon discours. Il voyoit que si Dieu par la loy de nature, & des gens, auoit prouueu de remedes oportuns contre la Tyrannie, qui est le plus grand & le plus redoutable mal qui puisse aduenir en vne communauté, Monarchie, Aristocratie, ou Republique, desquels remedes se seroient louablement seruis plusieurs peuples: il voyoit, dis-je, que si la diuine prouidence auoit par la lumiere naturelle prouueu de remedes à toutes assemblees, voire Payēnes, il n'estoit pas possible que Iesus Christ souverain Sageſſe & Charité, eut laissé en cas de Tyrannie & de souverain mal, depourueu d'ayde & de secours son Eglise, la plus diuine, & chere assemblee & communauté de toutes. Or ceste ayde il tire ordinairement, non des Princes seculiers estrangers, comme faisoient, & font encor les Payēs, mais de la direction de son Vicaire (comme en la loy de Moysse du souverain Prestre) qui est la voye la

plus douce & la plus asseuree de toutes, estant luy le pasteur, & le Pere commun de tous les Chrestiens, & qui assisté de l'esprit de Dieu procedera sans passion, cherchant syncerement & fidellement l'honneur de son maistre, & le profit de ses enfans, comme clairement l'a deduit Richeome en son Examen, que M. Seruin a leu & glosé: Et quand ce Pasteur faudroit à son deuoir, entreprenant plus qu'il ne doit, les Roys ont congé de la loy de Dieu de chercher les moyens licites pour se defendre: Et quand il aduiendroit qu'il fust heretique, le mesme Seigneur pour remede a donné autorité à son Eglise de le deposer & corriger, & au besoin appeller au secours les Princes seculiers Catholiques. Que dit M. Seruin contre ceste doctrine? C'est la doctrine des Saints Conciles, & anciens Decrets & Docteurs qui s'impriment, se vendent, & se lisent à Paris & ailleurs sans contredit. Qu'y a-il donc contre Suarez, qui n'enseigne autre doctrine?

M A I S comment fera il croire que Suarez ait esté si meschant & si mal aduisé, d'auoir escrit contre les Roys des maximes execrables, & tendantes à sedition,



& à faire rebeller les subiects contr'eux? Qui croira que ce Theologien ait escrit ces maximes pleines d'impieté, luy qui a sainctement enseigné les loix diuines dès sa ieunesse es plus celebres Vniuersitez du monde, avec vn concours d'auditeurs indicible, & louange de tous les gens doctes? qui a escrit doctement de toutes les parties de la Theologie ou peu s'en faut? qui a vescu entre les Iesuites plus de cinquante ans en reputation d'un bon Religieux?

M A I S qui l'estimera si imprudent, & mal-aisé d'auoir escrit en face, & aux terres de son Roy des maximes execrables contre les Roys? Qui croira que l'Inquisition d'Espagne ait esté si peu sage en son faict, ou si peu soigneuse du salut de son Prince, qu'elle ait peu ignorer, ou voulu dissimuler ces maximes si elles estoient preiudiciables à la Couronne d'Espagne, ou à la vie du Roy? Icy M. Seruin s'est aduisé d'une subtilité, disant que Suarez a exempté le Roy d'Espagne de la pretendue dit-il, *subiection Pontificale*, parce qu'il n'a apporté aucun exemple de deposition des Roys d'Espagne, qui seroit cause qu'il ne s'en est formalisé. Et qui a donné l'autorité à Sua-

rez, pauvre Religieux, d'exempter son Roy d'une subiection qu'il tient estre de droit diuin, & vn article de foy, comme note M. Seruin en gros caracteres, & s'en mocque? Mais quel discours de tirer des conclusions affirmatiues d'un antecedent negatif? La cause qu'il n'a cité aucun exemple d'Espagne, c'est parce qu'il n'y en auoit point. En deuoit-il feindre pour faire tout egal, & dire le mensonge pour orner la verité? Que si M. Seruin en a quelqu'un, il luy plaira d'en donner aduis, afin que Suarez le mette en liste. Mais quand le Roy d'Espagne n'eust voulu faire aucune iustice de ce Liure, qui croira que les Empereurs, les Roys & les autres Princes tous jaloux de leurs Corônes, comme le Roy d'Espagne de la sienne, ne l'eussent fait pour leurs droits s'ils pretendoient estre lezez? Qui croira encor que les Vniuersitez, & Escholes de Theologie Catholiques, qui aiment & honorent leurs Princes, comme la loy de Dieu commande, ne se fussent ressenties de ceste peruerse doctrine? Que ce noble corps de Sorbonne & la Faculté de Theologie de Paris, Mere de toutes les Facultéz de la Chrestienté, & tres-amoureuse de



l'honneur & salut de son Roy, n'eust sonné  
mot cōtre vn liure pernicious aux Rois, &  
à leur Estat, & à la Religio Catholique? Or  
est-il qu'aucun Prince, ny aucune assemblée  
Catholique ne s'est formalisée d'iceluy,  
ains plusieurs l'ont loué. M. Seruin a il plus  
de suffisance, de conscience, & de zele  
que tous les Sages Princes, & les cōscien-  
tieux Docteurs de l'Europe? que tous les  
Theologiens & Jurisconsultes de la Chre-  
stienté? Certes s'il le pense il a grande o-  
pinion de soy; mais il ne persuadera pas  
à tous son opinion, & croira-on plus au  
silence de tant de gens, qu'à ses paroles  
escrites contre Suarez. Mais croit-il luy-  
mesme que tout le monde soit vne grue,  
& qu'il n'y ait aucun homme, aucun Do-  
cteur, ny François, ny autre, qui ait des  
yeux pour voir les erreurs, & peser les  
paroles espouventables de sa Remon-  
strance, & les exposer? taster le poux de  
son intention, & s'appercevoir à quel  
blanc il bute? Car à quelle fin tant d'ar-  
deur, & pour qui traueille-il tant, accu-  
sant Suarez qui parle contre les Tyrans?  
Et pour quel Prince dresse-il sa defense,  
combatant ce Docteur? Ce n'est pas pour  
les Princes estrangers Catholiques, qui  
ne se soucient de telle defense, & comme

ie viens de dire, ne pretendent aucun preiudice de ce Liure, comme ils tesmoignent par leur silence, & quelques-vns par leurs paroles; Car comme i'ay dit, ils l'ont loué. Est-ce pour le Roy de France? encor moins; Car ce Roy est tres-esloigné de telle qualité, estant Prince tres-Chrestien, fils aîné de l'Eglise, & qui doit moins redouter la puissance des Papes qu'aucun Prince Chrestien appuyé de ses droicts, & de mille & mille merites de ses ancestres, gagnez à la defense des Papes, & du saint Siege, qui le rendent digne de ses benedictions. Il est donc certain que M. Seruin aduocasse pour quelque Prince qui n'entend point volontiers parler de la puissance des Papes, & qui pretend estre luy-mesme Pape, & croit que tous les Roys sont en leur Royaume chefs aussi bien en la police Ecclesiastique comme au gouuernement temporel. Et c'est aussi la foy de M. Seruin, laquelle il a professee de viue voix, & publiee par escrit en ses plaidoyez, & ce au fin premier, où il escrit sa profession en ces mots.

*La foy  
d'Angle-  
terre pro-  
fesse par  
l'Aduocat  
tom. Plaid.*

*La souveraine puissance des Roys establie de la main de Dieu, aussi bien en la directio de la Poli-*

*1. pag. 40.*



ce Ecclesiastique, comme pour le gouvernement temporel de l'Estat, ne se peut prescrire. Souueraine puissance, dit-il, non seulement du temporel, mais aussi en l'Eglise; Y a-il Ministre Anglois qui en vueille plus dire en Angleterre en faueur du Roy, & Religion d'Angleterre, que faict ce François en vn Royaume tres-Chrestien, preschant contre la Religion du Roy duquel il se dit Aduocat? Et faut noter qu'il tient par ces paroles que ceste souueraine puissance est donnee aux Roys par droit diuin de la main de Dieu, dit-il; comme par assertion de contraire heresie. Il escrit en vn autre lieu; *Que la puissance & Primat du S. Siege, est de droit humain, & introduit par coustume*; l'vne & l'autre heresie renuersant les fondemens de la Religion Catholique, & confondant le ciel & la terre en la Monarchie de l'Eglise de Dieu; heresie du tout infernale, & forgee contre l'expresse parole de Dieu, qui tesmoigne que Iesus-Christ a constitué de sa propre bouche, & immediate autorité saint Pierre chef vniuersel & Pasteur souuerain de son troupeau, disant à saint Pierre & à ses successeurs, non à Cæsar ou Herode, *Fay mes brebis*: Ce n'est pas donc

Il dit que  
le Primat  
de S. Pierre  
vient de  
droit hu-  
main par  
coustume  
& usur-  
pation. tom.  
2. Plaid. 3.  
fol. 106. a,  
& tom. 4.  
Plaid. 3. p.  
12.

Pasce oues  
meas.

donc pour le Roy de France ou autres Rois Catholiques que M. Seruin a escrit contre le Liure de Suarez, & procuré qu'il fut brulé ; mais pour ce Roy duquel l'Ambassadeur estant en Espagne à Madry l'an 1613. en Iuin, soudain qu'il eut veu le Liure imprimé se vanta que son Maistre auoit assez de credit de le faire bruler dans Paris. Depuis lequel temps M. Seruin a espié son appoinct, nommément du temps du Synode National des Ministres tenu au mois de May à Tonins en Gascogne, quod il minutoit la remonstration pour le mois de Iuin suivant ; auquel Synode se trouua vn Ministre Anglois pour mesme fin, encor que sous pretexte d'accorder le Ministre de Charenton, avec celui de Sedan sur quelque different de la Iustification. En ce Synode de Singes, les Iesuites furent condamnez avec Suarez, comme il appert par l'Auteur de l'assassinat du Roy, Auteur ouuertement huguenot, & libelle pernicieux & injurieux à leurs Majestez, & aux plus grands Seigneurs de la France, seditieux & impie, où il couche l'extraict des actes dudit Synode en ces termes. *Pource que la doctrine des Iesuites contre la vie, les Estats*

*L'Ambassadeur du Roy d'Angleterre à Madry, l'an 1613.*

*Conclusion de l'assemblée des Ministres à Tonins.*



*Et l'autorité des Roys se prouigne & publie impudemment par les principaux de ceste secte, Suarez ayant depuis peu de mois renchery sur ses compagnons en l'escriit qu'il a nouuellement publié, la Compagnie detestant ceste abominable doctrine avec ses autheurs, exhorte tous fideles l'auoir en horreur, & tous ceux qui ont charge d'enseigner de la combattre viuement. Sur lequel extraict a prins le suc & la forme de sa remonstrance M. Seruin, & a autorisé l'impudente calomnie des Ministres contre les Iesuites; qui neantmoins se sentent fort honorez d'estre condamnés par tels Iuges. Il fut encor arresté qu'on procureroit chaudement que le Livre dudit Suarez seroit brulé à Paris, & qu'apres tous les Ministres de France & d'Angleterre trauailleroient à faire retentir la condamnation par tout, & publieroient à cor, & à cry que les Iesuites enseignent de tuer les Roys, selon la note de l'Anticoton, & de tous les errans qui les persecutent de ceste calomnie depuis vingt-cinq ans, leur attribuant l'heresie que Luther & Calvin ont enseignee, & que ceux-cy mettront en œuure quand ils verront leur aduantage. M. Seruin a esté le grand Ministre & la grande trom-*

pette en cecy, & a plus faict que tous les Ministres ensemble, & a sollicité l'affaire d'une violence si ardente, mesmes dans l'enclos sacré de Iustice, qu'il cuida faire une meslee extraordinaire de toutes les Chambres des Enquestes & Requestes, avec la Grande, & la Tournelle, & celle de l'Edict; sommant de bouche tout le monde à môstrer son zele enuers le Roy, & en son cœur cherchant d'accomplir la volonté du Roy d'Angleterre, & la ruine des Iesuites; Et si vostre prudence n'eust bridé sa passion, il eust allumé vn feu plus grand que de papier. Or ayant obtenu une partie de ce qu'il demandoit, il a publié l'Arrest, & encor l'arresté que la Cour a de coustume de garder en ses Registres, y adioustât cette remonstrance pleine de fiel: la semant comme i'ay dict par toute la France à milliers d'exemplaires imprimez en maintes villes huguenottes & autres, non pour autre fin que pour diffamer les Iesuites selon l'intention & conclusion Synodiale des Ministres; Car s'il eust cherché le salut de son Roy, & la paix du Royaume, il deuoit, comme i'ay remonstré, non semer par ereries, & par escrits & placards, mais



supprimer d'un eternal silence les maximes qu'il appelle execrables, & pernicieuses à l'Estat, & personne des Roys. Bõ Dieu quel Aduocat du Roy est cecy, & Procureur de Iustice! qui fait tant du zelé du seruice & salut du Roy, & seme des bruits pernicioeux au Roy, & au Royaume, mesme selon sa confession! Qui a presté le serment de fidelité à son Roy, & combat la Religion de son Roy, pour celle du Roy d'Angleterre! Qui fait semblant de chercher le bien de la France, & en effet veut metamorphoser par ses maximes la France & sa paix à la Religion, & confusiõ del'Angleterre! Qui demande qu'on ne publie aucuns mauuais Liures, & c'est luy qui les publie, & fauorise ceux qui les publient, & ne parle sinon contre les auteurs Catholiques nommément Iesuites! Qui ne sonne mot contre les heresies & blasphemes d'Angleterre, & deschire Suarez qui les refute! Qui demande à la peine Clarus, Bonascius, Gresserus, Richeome & autres, desquels il appelle le style sanguinaire, parce qu'il est fasché dequoy ils assennent viuement le coup dans les veines des heresies qu'il defend en ses plaidoyez sous

*style sanguinaire.  
pag. 13.*

la robbe d'vn Aduocat Catholique , & aux despens de l'autorité & Religion du Roy . Mais est-il seant à la grauité & personne d'vn Aduocat de Roy d'vser de ces mots de boucher , mesmes contre la verité pour iniurier les escrits de gens Religieux & de paix ? ou s'il y prenoit goust, & s'il estoit Catholique, n'en deuoit il pas plustost surnommer le style de Calvin, de Beze & des autres Ministres, qui par leurs escrits & menees ont faict baigner la France au sang de plusieurs millions d'hommes , en quatre grosses batailles , & aux guerres de 40. ans ? Mais en ceste façon de parler & de faire, n'imitte-il pas les anciens errans qui mordoient ainsi les escriuains Catholiques qui leur faisoient teste ? Ainsi les Pelagiens disoiēt sanguinaire & turbulent le style de S. Ierosme, & ainsi les autres errās blasonnoiēt celui de S. Augustin, de S. Gregoire & d'autres Docteurs Catholiques , qui faisoiet à bon esciēt saigner leurs opiniōs heretiques ! Il attaque encor Richeome lequel refutāt les impostures (nō de M. Pierre de la Marteliere, cōme escrit M. Seruin, mais de l'Anticoton que M. Seruin ne veut nommer par espargne) auoit dict,



que Mariana auoit failly, dequoy parlant de Tyranno, il n'auoit suiuy entierement la decision du Concile de Constance, luy dit par sincerité que Richeome a osé soustenir l'opinion de Mariana. Si Richeome condamne l'opinion de Mariana comment la soustient-il? Mais il l'ensuit en vne autre chose! faict il mal si l'autre dict bien? Mariana croit qu'il y a vn Dieu, & qu'il y a vn Iesus-Christ, qu'il y a vn Pasteur souuerain en son Eglise, & les autres poincts de la foy Catholique, Richeome le croit aussi; tient-il pour cela l'affertion de Mariana condamnée? n'est-ce pas calomnier à credit de le dire? mais il adiousté que Richeome l'a loué en ce qu'il dit que ce n'est pas à la populace de faire iugement d'un Tyran; ains à l'assemblée des hommes sages du Royaume. Donc conclud M. Seruin il enseigne de deposer les Roys! De quelle teste faict venir M. Seruin ceste queuë? s'ensuit-il que Richeome enseigne de deposer les Roys? dequoy il dit que ce n'est pas au particulier ny au peuple de iuger de la qualité d'un Tyran, & que s'il aduenoit qu'il le fallust faire, c'est aux gens sages. Est-ce enseigner de deposer les Rois? Qui fera ces consequences sinon celuy qui est a-

ueuglé de sa passion? Et qu'a dit icy Richeome que les loix & la nature ne dient? qui fera iugement d'un vice & d'un crime, que les gens doctes, sages & consciencieux? Que faict donc M. Seruin sinon reprendre les bonnes loix, & par vne mauuaise Logique tirer vne conclusion mensongere d'une vraye premissse, & faire venin du jus de roses? Richeome auoit dit encor contre le mesme Anticoton, *que ce qu'auoit escrit Mariana du poison, estoit selon la doctrine de l'Eglise Catholique.* De là il tire encor qu'il enseigne estre licite de tuer & empoisonner, & au lieu de monstrier, pour conuaincre Richeome en sçauant Aduocat, que ce n'est pas la doctrine del'Eglise, il crie, *propos horribles & espouuentables!* Discourt-il deuant des petits enfans pour les espouuanter, parlant à vne Cour souueraine? En somme il est si equitable, qu'il obiecte à Richeome comme par reproche, de quoy il a procuré que cet examen categorique contre l'Anticotō fut approuué par des Docteurs Catholiques. Vn officier du Roy doit-il reprocher comme faute, de quoy on garde les Ordōnances Royaux, & les loix de bōne police? Loix que luy-mesme deuoit



soigneusement garder, donnant exemple en bon officier public, & comme bien aduisé & humble escriuain ; employer le conseil & la main de quelque sçauant Docteur qui raddressast les lignes tortues de ses escrits : à faute dequoy il a mis au iour des plaidoyez remplis des heresies de Caluin & de Luther ; laissant à part les autres erreurs de sa science & vacation, desquels en son temps quelque bon Iuriconsulte luy fera voir la liste. Mais combien de tours & meandres a-il fait pour remplir ses placcards ; & rendre infames & odieux les Iesuites à tous frais de sa conscience & reputation ? En combien de poincts s'est-il rendu criminel, les voulant faire criminels ? oppugnant la Religion de son Roy pour establir celle du Roy d'Angleterre ? diffamant vn Docteur, & vn Ordre Religieux iugé fidelle à l'Eglise & aux Roys ? donnant faux entendre à la Cour contre l'honneur du S. Siege ? ayant tourné le sens de l'Auteur, & exposé ce qu'il a dit de la puissance spirituelle du Pape sur les Tyrans, comme estant dit contre le temporel des Rois ? Combien de fautes en peu de periodes de ceste remonstrance placcardiere & fameuse ?

meuse? Et qu'est il besoin d'en dire davantage? C'est à vous, Messieurs, d'entendre & iuger de ce qui est dit, de quelle peine est digne celuy qui persecute les innocens, & leur procure la peine! Certes si Suarez a esté brulé pour auoir mis au iour hors de faison la question des Tyrās, mesme ne sçachāt le decret de son General sur tel subiect; quelle rigueur merite celuy qui non seulement sans propos, mais contre toute iustice a escrit vn libelle fameux plein de maligne passion, & faction sous tiltre de remonstrance de iustice? qui a publié des heresies manifestes en autant d'œuvres qu'il a mis au iour contre la Religion Catholique, & contre l'honneur & bien de la France, desquelles heresies la moindre ne peut estre expiée que par seuerē penitence en ceste vie, ou par le feu eternel en l'autre? Je ne luy souhaite aucun mal, ains ie supplie le Iuge qui le doit iuger, de luy ouurir les yeux pour voir la verité deuant qu'il les ferre à la mort, & ne le chastie en l'autre monde en la fureur de son ire, des maux qu'il a commis, & luy faisant misericorde du passé, le garde à l'aduenir d'en commettre plus. Je me contente d'auoir remon-



stré; comme ie remonstre pour la defense de la verité; qu'il a voulu circonuenir la Cour par vn faux donné entendre; qu'il a remply la France de bruits fameux, heretiques, & pernicious à la Religion Catholique & à l'Estat. & personne des Roys, que toutesfois il a prins pour pre-  
texte de ses menees & prattiques; qu'il n'est ny Iuge competent, ny expositeur suffisant d'un point de Theologie, nom-  
mément qui concerne la Religion Catholique, n'estant luy Theologien. comme il monstre assez, ny enfant de l'Eglise qui tient la clef de la verité, laquelle il persecute par ces heresies; Remonstre qu'il s'est serui, contre la fidelité d'un officier de Roy, de l'auctorité du Roy contre le Roy & sa Religion, qui est vn tres-mauuais seruice; qu'il accuse & persecute des personnes fideles au seruice des Roys contre le droit & la verité de Justice; que ce n'est pas le bien du Roy & du royaume qu'il cherche en ses menees, efforts, & remonstrance, mais s'il peut la ruine des Iesuites pour repaistre & contenter sa passion, & faire la cause des ennemis de l'Eglise de Dieu contre le saint Siege, le grand creue-cœur, & la bute de

l'heresie de Luther, Caluin & de tous les errans de nos siecles. Pour ces causes, Messieurs, vostre prudence considerera s'il doit estre creu en ses informations & rapports, & si ceux qu'il persecute iniustement sous pretexte de defendre le salut des Roys, sont plus dignes de vostre protection estans fideles seruiteurs des Roys que les Ministres de Tonins, & ceux qu'il defend sous main aux despens de la religion de son Roy, & du repos & honneur de son Royaume. Mais quoy qu'il die, qu'il face, & qu'il aduance, les Iesuites sont resolu de seruir Dieu, le Roy, & la France avec toute fidelité, humilité & syncerité, & vous honorer comme Peres. Que si apres auoir employé leurs forces, industries & traux à bien faire, ils sont guerdonnez d'iniures, & calomnies, ils rendront graces au Seigneur qu'ils seruent, de quoy il leur aura fait la faueur de boire en sa coupe, & porter la Croix apres luy, pour auoir la Couronne qu'il a promise à ceux qui endureront opprobres & ignominies pour la gloire de son saint Nom.























